

TERHAD



KHUTBAH KHAS
SAMBUTAN HARI ULANG TAHUN ATM KE - 87



“ KEDAULATAN NEGARA TANGGUNGJAWAB BERSAMA ”

اَلْحَمْدُ لِلّٰهِ الْقَائِلِ :

كَمْ مِنْ فِئَةٍ قَلِيلَةٍ غَلَبَتْ فِئَةً كَثِيرَةً بِإِذْنِ اللّٰهِ وَاللّٰهُ مَعَ الصّٰبِرِيْنَ

أَشْهَدُ أَنْ لَا إِلَهَ إِلَّا اللّٰهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ

الَّذِي أَرْسَلَهُ كَافَّةً لِلنَّاسِ بَشِيرًا وَنَذِيرًا، وَهَادِيًا إِلَى الْحَقِّ وَسِرَاجًا مُنِيرًا.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.

أَمَّا بَعْدُ، فَيَا عِبَادَ اللّٰهِ، اتَّقُوا اللّٰهَ، أَوْصِيكُمْ وَإِيَّايَ بِتَقْوَى اللّٰهِ، فَقَدْ فَازَ

الْمُتَّقُونَ.

SAUDARA SIDANG JUMAAT SEKELIAN,

BERTAKWALAH KEPADA ALLAH SWT DENGAN MELAKSANAKAN SEGALA PERINTAH-NYA DAN MENJAUHI SEGALA LARANGAN-NYA. BERSEMPENA DENGAN SAMBUTAN HARI ULANG TAHUN ANGKATAN TENTERA MALAYSIA KE-87 PADA TANGGAL 16 SEP 2020 MAKA KHATIB HARI INI MENGAJAK SAUDARA SIDANG JUMAAT SEKELIAN UNTUK MENGHAYATI KHUTBAH YANG BERTAJUK : **“KEDAULATAN NEGARA TANGGUNGJAWAB BERSAMA”**.

SAUDARA SIDANG JUMAAT SEKELIAN.

NEGARA YANG BERDAULAT MENGIKUT TAKRIFAN UNDANG-UNDANG ANTARABANGSA ADALAH SUATU ENTITI BIDANG KUASA BUKAN FIZIKAL DIWAKILI PEMERINTAH BERPUSAT YANG MEMILIKI KEDAULATAN KE ATAS SUATU KAWASAN GEOGRAFI TERTENTU. NEGARA YANG

TERHAD

BERDAULAT MEMPUNYAI POPULASI ATAU KEPENDUDUKAN YANG KEKAL, LINGKUNGAN KAWASAN SEMPADAN YANG JELAS, SEBUAH PEMERINTAHAN YANG KUKUH DAN BERKEUPAYAAN MENJALINKAN HUBUNGAN DIPLOMATIK DENGAN NEGARA-NEGARA LAIN. NIKMAT HIDUP DALAM NEGARA YANG MERDEKA DAN DILIMPAHI DENGAN REZEKI YANG MELIMPAH ADALAH SEBAHAGIAN DARI ANUGERAH ALLAH SWT YANG PERLU UNTUK DISYUKURI OLEH SETIAP INDIVIDU MUSLIM. ANUGERAH DARI SIFAT KASIH SAYANG ALLAH INI DAPAT DILIHAT MELALUI FIRMAN ALLAH SWT DALAM SURAH SABA' AYAT 15:

﴿لَقَدْ كَانَ لِسَبَإٍ فِي مَسْكَنِهِمْ آيَةٌ ۖ جَنَّتَانِ عَنْ يَمِينٍ وَشِمَالٍ ۚ كُلُوا مِنْ رِزْقِ

رَبِّكُمْ وَاشْكُرُوا لَهُ ۗ بَلْدَةٌ طَيِّبَةٌ وَرَبٌّ غَفُورٌ﴾

MAKSUDNYA : *SESUNGGUHNYA BAGI KAUM SABA' ADA TANDA (KEKUASAAN TUHAN) DI TEMPAT KEDIAMAN MEREKA YAITU DUA BUAH KEBUN DI SEBELAH KANAN DAN DI SEBELAH KIRI. (KEPADA MEREKA DIKATAKAN): "MAKANLAH OLEHMU DARI REZEKI YANG (DIANUGERAHKAN) TUHANMU DAN BERSYUKURLAH KAMU KEPADA-NYA. (NEGERIMU) ADALAH NEGERI YANG BAIK DAN (TUHANMU) ADALAH TUHAN YANG MAHA PENGAMPUN".*

SAUDARA SIDANG JUMAAT SEKELIAN ,

UNTUK MEMPEROLEHI NIKMAT KESEJAHTERAAN DAN KEAMANAN HIDUP DALAM SEBUAH NEGARA YANG MEMPUNYAI PELBAGAI NIKMAT DI ATAS IANYA MELALUI PROSES PENGORBANAN DAN USAHA YANG BERTERUSAN DARI SETIAP WARGANYA. PEMELIHARAAN KEDAULATAN NEGARA BERMULA DENGAN PENYEDIAAN SATU KETUMBUKAN KETENTERAAN YANG PADU DAN LENGKAP TERDIRI DARI ANAK WATAN YANG BERSEMANGAT RELA BERKORBAN DEMI MENJAGA SETIAP INCI IBU PERTIWI DARI SEBARANG BENTUK PENCEROBOHAN MUSUH.

TERHAD

ANGKATAN TENTERA MALAYSIA SEJAK DITUBUHKAN PADA 87 TAHUN YANG LAMPAU TELAH TERBUKTI BERJAYA MENUNJUKKAN TAHAP PROFESIONALISMA YANG TINGGI DALAM MENGGALAS AMANAH NEGARA MENJAGA SEMPADAN NEGARA DARAT, LAUT MAHUPUN UDARA DARI DIBOLOSI OLEH PIHAK MUSUH. TAHAP KEUPAYAAN ATM DALAM MELAKSANAKAN SETIAP MISI TERUS MENDAPAT PENGIKTIRAFAN DAN KEPERCAYAAN DARI PIHAK PERTUBUHAN BANGSA-BANGSA BERSATU MELALUI PENGHANTARAN PASUKAN ATM DALAM BEBERAPA MISI PENGAMAN. SEJARAH TANAH AIR TELAH MENCATATKAN SEMANGAT PERJUANGAN DAN KEBERANIAN BARISAN ANAK BANGSA SEBAGAI PEJUANG NEGARA KETIKA MEMBELA TANAH AIR INI DARI ANCAMAN MUSUH DALAM EPISOD PERJUANGAN KHUSUSNYA DALAM MENENTANG INSURGENSI KOMUNIS, KONFRANTASI MALAYSIA-INDONESIA DAN PERISTIWA 13 MEI. LIPATAN SEJARAH TURUT MEMAPARKAN RAMAI DI KALANGAN ANGGOTA ATM YANG CEDERA DAN GUGUR. PERJUANGAN MEREKA INI BAGI MEMPERTAHANKAN KEDAULATAN NEGARA HARUS DIKENANG SELAMANYA KE ARAH MEMBINA GENERASI YANG BERMARUAH DAN MEMILIKI JATI DIRI BANGSA YANG UNGGUL. FIRMAN ALLAH SWT DALAM SURAH ALI IMRAN AYAT KE 169:

﴿وَلَا تَحْسَبَنَّ الَّذِينَ قُتِلُوا فِي سَبِيلِ اللَّهِ أَمْوَاتًا ۚ بَلْ أَحْيَاءٌ عِنْدَ رَبِّهِمْ يُرْزَقُونَ﴾

MAKSUDNYA: "JANGANLAH KAMU MENGIRA BAHWA ORANG-ORANG YANG GUGUR DI JALAN ALLAH ITU MATI; BAHKAN MEREKA ITU HIDUP DISISI TUHANNYA DENGAN MENDAPAT REZEKI."

MEMASUKI ERA BARU PERTAHANAN DAN KESELAMATAN NEGARA, ORGANISASI ATM DAN RAKYAT PERLU BERGANDING BAHU DAN BERSATU TENAGA UNTUK MEMASTIKAN KESELAMATAN NEGARA TERUS TERPELIHARA. ANCAMAN MASA KINI YANG LEBIH KOMPLEKS DAN

TERHAD

MEMERLUKAN PEMERHATIAN DAN PENYALURAN MAKLUMAT YANG BENAR KEPADA SETIAP AGENSI KESELAMATAN PERLU MENDAPAT DOKONGAN PENUH DARI MASYARAKAT AWAM. PERISTIWA PENCEROBOHAN PANTAI TIMUR SABAH PADA FEB 2013 ANTARA BENTUK ANCAMAN KESELAMATAN YANG MENUNTUT PIHAK ATM SENTIASA BERSIAPSIAGA DENGAN SEGALA KEKUATAN YANG ADA BAGI MEMASTIKAN KEDAULATAN NEGARA TERUS DIPERTAHANKAN. ANTARA ANCAMAN-ANCAMAN LAIN YANG SEHARUSNYA KITA TIDAK ALPA ADALAH ANCAMAN KESELAMATAN DARI PENGGANAS *JAMAAH ISLAMIYYAH* (JI) DAN *ISLAMIC STATE* (IS), IDEOLOGI PENGGANAS DAESH, KETEGANGAN DAN KONFLIK PENGANUT AGAMA DI SELATAN FILIPINA, KETEGANGAN KAUM DI MALAYSIA YANG DICETUSKAN OLEH RADIKALISASI POLITIK, KEBANJIRAN PENDATANG ASING TANPA IZIN (PATI), PENULARAN FAHAMAN AJARAN SESAT DAN EKSTRIM SERTA LAIN-LAIN MASALAH SOSIAL YANG MELANDA NEGARA.

SAUDARA SIDANG JUMAAT SEKELIAN.

NEGARA YANG MAJU DAN BERKEMBANG PESAT ADALAH HASIL DARI KERJASAMA UTUH DALAM MEMBINA KEMAJUAN NEGARA. SEMUA RAKYAT TERUTAMA GOLONGAN BELIA DAN REMAJA BERTANGGUNGJAWAB UNTUK MEMBINA NEGARA DAN MENJAGA KEDAULATAN SERTA MENGEKALKAN KESELAMATANNYA. REMAJA MERUPAKAN ASET PENTING BAGI MENENTUKAN MASA DEPAN SESEBUAH NEGARA KERANA MEREKA MERUPAKAN BAKAL PEMIMPIN NEGARA. UNTUK TUJUAN TERSEBUT MAKA MEREKA PERLU MEMILIKI SEMANGAT PATRIOTIK YANG TEBAL DAN SAYANGKAN NEGARA INI. GOLONGAN BELIA YANG PROAKTIF DAN MEMPUNYAI WAWASAN JELAS BERTINDAK SEBAGAI PENGGERAK KEPADA KEMAJUAN SESEBUAH NEGARA.

TERHAD

SAUDARA KAUM MUSLIMIN YANG DIRAHMATI ALLAH,

GOLONGAN YANG AMAT PENTING PERANANNYA DALAM MENJAGA KEDAULATAN NEGARA IALAH MEREKA YANG MEMEGANG TAMPUK PEMERINTAHAN. PEMIMPIN YANG TERBAIK ADALAH MEREKA YANG AMANAH DALAM MEMIKUL TANGGUNGJAWAB MENGENDALIKAN URUSAN NEGARA. MEREKA BERPERANAN UNTUK MENJAGA KEPENTINGAN SETIAP RAKYAT DIBAWAH PEMERINTAHANNYA TANPA MENGIRA KAUM DAN AGAMA DENGAN MEMBERIKAN SETIAP INDIVIDU HAK SEBAGAI WARGA NEGARA. KETAATAN KEPADA PEMIMPIN YANG ADIL MENJADI SEBAHAGIAN DARI ELEMEN IBADAT SEBAGAI MANA TERKANDUNG DALAM AL-QURAN DARI SURAH AN-NISA' AYAT 59:

﴿ يَا أَيُّهَا الَّذِينَ آمَنُوا أَطِيعُوا اللَّهَ وَأَطِيعُوا الرَّسُولَ وَأُولِي الْأَمْرِ مِنْكُمْ ۗ ﴾

﴿ فَإِنْ تَنَازَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِنْ كُنْتُمْ تُؤْمِنُونَ بِاللَّهِ

وَالْيَوْمِ الْآخِرِ ۗ ذَٰلِكَ خَيْرٌ وَأَحْسَنُ تَأْوِيلًا ۗ ﴾

MAKSUDNYA : *“WAHAI ORANG YANG BERIMAN TAATLAH ALLAH DAN TAATLAH RASUL (MUHAMMAD SAW) DAN ULIL AMRI (PEMEGANG KEKUASAAN) DI ANTARA KAMU . KEMUDIAN JIKA KAMU BERBEZA PENDAPAT TENTANG SESUATU, MAKA KEMBALILAH KEPADA ALLAH (AL-QURAN) DAN RASUL (SUNNAHNYA) , JIKA KAMU BERIMAN KEPADA ALLAH DAN HARI KEMUDIAN. YANG DEMIKIAN ITU LEBIH UTAMA BAGIMU DAN LEBIH BAIK AKIBATNYA”.*

PERANAN ORANG RAMAI SEBAGAI WARGA NEGARA ADALAH MENJAGA TATASUSILA HIDUP DALAM SEBUAH NEGARA YANG BERBILANG KAUM DAN BUDAYA DENGAN MENJADIKAN RUKUN NEGARA SEBAGAI TERAS DALAM KEHIDUPAN SEHARIAN. PENGHAYATAN PRINSIP RUKUN

TERHAD

NEGARA MEMBANTU SETIAP INDIVIDU UNTUK MENJAGA SENSITIVITI KAUM YANG LAIN DALAM PERGAULAN SETERUSNYA MEMUPUK PERASAAN BERTUAH HIDUP DALAM SEBUAH NEGARA YANG BERDAULAT DAN MEMPUNYAI BUDAYA DAN ADAT RESAM YANG PELBAGAI. MALAH KEPELBAGAIAN TERSEBUT DIJADIKAN ASAS KUKUH UNTUK MEMBINA KEKUATAN DAN KEUNIKAN YANG TERSENDIRI. MALAYSIA PERLU DIKENALI BUKAN HANYA MAKMUR DARI SEGI EKONOMI DAN PEMBANGUNAN MALAH MENJADI NEGARA BERIDENTITIKAN KEPELBAGAIAN AGAMA, BANGSA DAN BUDAYA SEKALI GUS DAPAT BERSAMA DALAM SUASANA AMAN SERTA HARMONI. FIRMAN ALLAH SWT DALAM SURAH AL HUJURAAT AYAT 13:

﴿ يَا أَيُّهَا النَّاسُ إِنَّا خَلَقْنَاكُمْ مِنْ ذَكَرٍ وَأُنْثَىٰ وَجَعَلْنَاكُمْ شُعُوبًا وَقَبَائِلَ لِتَعَارَفُوا ۗ ﴾

﴿ إِنَّ أَكْرَمَكُمْ عِنْدَ اللَّهِ أَتْقَاكُمْ ۗ إِنَّ اللَّهَ عَلِيمٌ خَبِيرٌ ۗ ﴾

MAKSUDNYA : *“WAHAI MANUSIA SESUNGGUHNYA KAMI TELAH CIPTAKAN KAMU DARI DARI SEORANG LELAKI DAN SEORANG PEREMPUAN KEMUDIAN KAMI JADIKAN KAMU BERBANGSA-BANGSA DAN BERSUKU-SUKU AGAR KAMU SALING MENGENAL. SESUNGGUHNYA YANG PALING MULIA DI ANTARA KAMU DI SISI ALLAH IALAH ORANG YANG PALING TAQWA. SESUNGGUHNYA ALLAH MAHA MENGETAHUI DAN MAHA TELITI”.*

KETIKA SELURUH DUNIA TERMASUK NEGARA MALAYSIA DIUJI DENGAN WABAK PANDEMIK COVID-19 BERMULA 18 MAC 2020, SELURUH PEGAWAI DAN ANGGOTA DARI KEMENTERIAN KESIHATAN MALAYSIA, ANGKATAN TENTERA MALAYSIA, POLIS DIRAJA MALAYSIA DAN BEBERAPA AGENSI KESELAMATAN TELAH MEMBERI SEPENUH TENAGA DAN USAHA UNTUK MENGHADAPI WABAK YANG MISTERI INI. UNTUK ITU BAGI

TERHAD

MEMBANTU KERAJAAN MEMUTUSKAN RANTAIAN COVID-19, SETIAP DARI KITA DIGESA UNTUK MENGAMALKAN NORMA BAHARU SEPERTI MANA YANG DIUMUMKAN OLEH KEMENTERIAN KESIHATAN MALAYSIA. KERJASAMA YANG ERAT ANTARA BARISAN HADAPAN (*FRONT LINERS*) DAN SETIAP AHLI MASYARAKAT AMAT DIPERLUKAN DALAM MENANGANI WABAK YANG MELANDA NEGARA. MARILAH SAMA-SAMA KITA MEMBANTU PIHAK BERWAJIB DENGAN MENGAMBIL SIKAP MEMATUHI SEGALA KETETAPAN YANG TELAH DIAMBIL KE ARAH MENANGANI PENULARAN COVID-19 KERANA IA ADALAH SEBAHAGIAN DARI PERANAN KITA DALAM MENJAGA KESELAMATAN DAN KEDAULATAN NEGARA MALAYSIA TERCINTA. FIRMAN ALLAH SWT DALAM SURAH AL-MAIDAH AYAT 2:

﴿وَتَعَاوَنُوا عَلَى الْبِرِّ وَالتَّقْوَىٰ ۖ وَلَا تَعَاوَنُوا عَلَى الْإِثْمِ وَالْعُدْوَانِ ۗ وَاتَّقُوا اللَّهَ ۖ إِنَّ اللَّهَ

شَدِيدُ الْعِقَابِ﴾

MAKSUDNYA: “SALING BANTULAH KAMU DALAM PERKARA KEBAIKKAN, JANGAN KAMU SALING BANTU DALAM PERKARA KEJAHATAN, BERTAQWALAH KAMU KEPADA ALLAH SESUNGGUHNYA ALLAH AMAT PEDIH SIKSAANNYA”.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُوا اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.